

Telakaṭāhagāthā

Namo tassa bhagavato arahato sammāsambuddhassa

1. Laṃkissaro jayatu vāraṇarājagāmī
Bhogindabhoga rucirāyata pīṇa bāhu,
Sādhupacāranirato guṇasannivāso
Dhamme ṭhito vīgatakodhamadāvalepo;
2. Yo sabbalokamahito karuṇādhivāso
Mokkhākaro ravikulambara puṇṇa cando,
Ñeyyodadhiṃ suvipulaṃ sakalaṃ vibuddho
Lokuttamaṃ namatha taṃ sirasā munindaṃ;
3. Sopānamālamamaṃ tidasālayassa
Saṃsāra sāgarasamuttaraṇāya setuṃ,
Sabbāgatībhaya vivajjita khema maggaṃ
Dhammaṃ namassatha sadā muninā paṇītaṃ;
4. Deyyaṃ tadappamapi yattha pasanna cittā
Datvā narā phalamuḷārataraṃ labhante,
Taṃ sabbadā dasabalenapi suppasatthaṃ
Saṅghaṃ namassatha sadāmitapuññakhettaṃ;
5. Tejo balena mahatā ratanattayassa
Lokattayaṃ samadhigacchati yena mokkhaṃ,
Rakkhā na catthi ca samā ratanattayassa
Tasmā sadā bhajatha taṃ ratanattayaṃ bho;
6. Laṃkissaro parahitekarato nirāso
Rattimpi jāgararato karuṇādhivāso,
Lokaṃ vibodhayati lokahitāya kāmaṃ
Dhammaṃ samācaratha jāgariyānuyuttā;
7. Sattopakāra niratā kusale sahāyā
Bho dullabhā bhuvī narā vihatappamādā,
Laṃkādhīpaṃ guṇadhanam kusale sahāyaṃ
Āgamma saṃcaratha dhammamamaṃ pamādaṃ;
8. Dhammo tiloka saraṇo paramo rasānaṃ
Dhammo mahaggharatano ratanesu loke,
Dhammo bhava tibhavadukkha vināsahetu
Dhammaṃ samācaratha jāgariyānuyuttā;
9. Niddaṃ vinodayatha bhāvayathappameyyaṃ
Dukkhaṃ aniccampi ceha anattatañca,
Dehe ratiṃ jahatha ja jajjarabhājanābho
Dhammaṃ samācaratha jāgariyānuyuttā;
10. Okāsa majja mama natthi suve karissaṃ
Dhammaṃ itīhalasatā kusalappayoge,
Nā'laṃ tiyaddhasu tathā bhuvanattaye ca
Kāmaṃ na catthi manujo maraṇā pamutto;
11. Khitto yathā nabhasi kenacideva leḍḍu

Bhūmiṃ samāpatti bhāratayā khaṇena,
Jātattameva khalu kāraṇamekamatra
Lokaṃ sadā nanu dhuvaṃ maraṇāya gantuṃ;

12. Kāmaṃ narassa patato girimuddhanāto
Majjhe na kiñci bhayanissaraṇāya hetu,
Kāmaṃ vajanti maraṇaṃ tibhavesu sattā
Bhoge ratiṃ pajahathāpi ca jīvite ca;
13. Kāmaṃ patanti mahiyā khalu vassadhārā
Vijjullatā vitatamegha mukhā pamuttā,
Evaṃ narā maraṇabhīma papātamajjhe
Kāmaṃ patanti nahi koci bhavesu nicco;
14. Velātaṇe paṭutaroru taraṃgamālā
Nāsaṃ vajanti satataṃ salilālayassa,
Nāsaṃ tathā samupayanti narāmarānaṃ
Pāṇāni dāruṇatare maraṇodadhimi;
15. Ruddhopi so rathavarassagajādhipēhi
Yodhehi cāpi sabalehi ca sāyudhehi,
Lokaṃ vivaṃciya sadā maraṇūsabho so
Kāmaṃ nihanti bhuvanattaya sālī daṇḍaṃ;
16. Bho mārutena mahatā vihato padīpo
Khippaṃ vināsa mukhameti mahappabhopi,
Loke tathā maraṇacaṇḍa samīraṇena
Khippaṃ vinassati narāyumahā padīpo;
17. Rāmajjunappabhūti bhūpati puṃgavā ca
Sūrā pure raṇamukhe vijitāri saṅghā,
Tepīha caṇḍa maraṇogha nimuggadehā
Nāsaṃ gatā jagati ke maraṇā pamuttā?
18. Lakkhī ca sāgarapaṭā sadharādharā ca
Sampattiyo ca vividhā api rūpasobhā,
Sabbā ca tā api ca mittasutā ca dārā
Ke cāpi kaṃ anugatā maraṇaṃ vajantaṃ?
19. Brahmāsurasuragaṇā ca mahānubhāvā
Gandhabbakinnaramahoragarakkhasā ca,
Te cā pare ca maraṇaggisikhāya sabbe
Ante patanti salabhā iva khīṇapuññā;
20. Ye sārīputtapamukhā munisāvakā ca
Suddhā sadāsavanudā paramiddhipattā,
Te cāpi maccuvaḷabhā mukha sannimuggā
Dīpānivānalatā khayataṃ upetā;
21. Buddhāpi buddhakamalāmalacārunettā
Battiṃsalakkhaṇa virājita rūpasobhā,
Sabbāsacakkhayakarāpi ca lokanāthā
Sammadditā maraṇamattamahāgajena;
22. Rogāturesu karuṇā na jarāturesu

- Khiḍḍāparesu sukumārakumārakesu,
Lokaṃ sadā hanati maccu mahāgajindo
Davānalo vanamivāvarataṃ asesam;
23. Āpuṇṇatā na salile na jalāsayassa
Kaṭṭhassa cāpi bahutā na hutāsanassa,
Bhutvāna so tibhūvanampi tathā asesam
Bho niddayo na khalu pītimupeti maccu;
24. Bho moha mohitatayā vivaso adhañño
Loko patatyapipi maccumukhe subhīme,
Bhoge ratiṃ samupayāti nihīnapañño
Dolā taraṅgacapale supinopameyye;
25. Ekopi maccurabhiantumalaṃ tilokaṃ
Kiṃ niddayā api jarāmarañānuyāyī,
Ko vā kareyya vibhasuvesu ca jīvitāsaṃ
Jāto naro supina saṃgama sannibhesu;
26. Niccāturaṃ jagadidaṃ sabhayaṃ sasokaṃ
Disvā ca kodhamadamohajarābhibhūtaṃ,
Ubbegamattamapi yassa na vijjatī ce
So dāruṇona maraṇaṃ vata taṃ dhiratthu!
Bho bho na passatha jarāsīdharañhi maccu
Māhaññamānamakhilaṃ satataṃ tilokaṃ,
Kiṃ niddayā nayatha vītabhayā tiyāmaṃ
Dhammaṃ sadā'savanudaṃ caratha'ppamattā;
28. Bhāvettha bho maraṇamāravivajjanāya
Loke sadā maraṇa saññamimaṃ yatattā,
Evañhi bhāvanaratassa narassa tassa
Taṇhā pahīyati sarīragatā asesā;
29. Rūpaṃ jarā piyataraṃ malinīkaroti
Sabbam balaṃ harati attani ghorarogo,
Nānūpabhoga parirakkhita mattabhāvaṃ
Bho maccu saṃharati kiṃ phalamattabhāve?
30. Kammānilāpahatarogataramaṅgabhaṃge
Saṃsāra sāgara mukhe vitate vipannā,
Mā māpamādamakarittha karotha mokkhaṃ
Dukkhodayo nanu pamādamayaṃ narānaṃ;
31. Bhogā ca mittasutaporisa bandhavā ca
Nārī ca jīvitasamā api khattavatthu,
Sabbāni tāni paralokamito vajantaṃ
Nānubbajanti kusalākusalaṃva loke;
32. Bho vijjucamaṅcalatare bhavasāgaramhi
Khittā purā katamahāpavanena tena,
Kāmaṃ vibhijjati khaṇena sarīranāvā
Hatthe karotha paramaṃ guṇahatthasāraṃ;
33. Niccaṃ vibhijjatiha āmaka bhājanaṃva
Saṃrakkhitopi bahudhā iha attabhāvo,

Dhammaṃ samācaratha saggapatipattiṭṭhaṃ
Dhammo suciṇṇamihameva phalaṃ dadāti;

34. Rantvā sadā piyatare divi devarajje
Namhā cavanti vibudhā api khīṇapuññā,
Sabbam sukham divi bhuvīha viyoganiṭṭham
Ko paññavā bhavasukhesu ratim kareyya?
35. Buddho sasāvakaḅaṇo jagadekanātho
Tāravalīparivutopi ca puṇṇacando,
Indopi devamakuṭamkita pādakañjo
Ko pheṇapiṇḍa-na-samo tibhavesu jāto?
36. Līlavatamsamapi yobbana rūpasobham
Attūpamaṃ piyajanena ca sampayogaṃ,
Disvāpi vijjucapalaṃ kurute pamādaṃ
Bho mohamohitajano bhavarāgaratto;
37. Putto pitā bhavati mātu patīha putto
Nārī kadāci jananī ca pitā ca putto,
Evaṃ sadā viparivattati jīvaloko
Citte sadāticapale khalu jātirāṅge;
38. Rantvā pure vividhaphullalatākulehi
Devāpi nandanavane surasundarīhi,
Te ve'kadā vitatakaṇṭakasamkaṭesu
Bho koṭisimbalivanesu phusanti dukkham;
39. Bhutvā sudhannamapi kañcanabhājanesu
Sagge pure suravarā paramiddhipattā,
Te cāpi pajjalitalohagulaṃ gilanti
Kāmaṃ kadāci narakālaya vāsabhūtā;
40. Bhutvā narissaravarā ca mahim asesam
Devādhīpā ca divi dibbasukham surammaṃ,
Vāsam kadāci khurasañcitabhūtalesu
Te vā mahārathagaṇānugatā divīha;
41. Devaṅganā lalitabhinnataraṅgamāle
Raṅge mahissarajaṭamakuṭānuyāte,
Rantvā pure suravarā pamadāsahāyā
Te cāpi ghorataravetaraṇim patanti;
42. Phullāni pallavalatāphalasaṃkulāni
Rammāni nandanavanāni manoramāni,
Dibbaccharālalitapuṇṇadarīmukhāni
Kelāsamerusikharāni ca yanti nāsam;
43. Dolā'nilā'nalataraṅgasamā hi bhogā
Vijjupabhāticapalāni ca jīvitāni,
Māyāmarīcijalomasamaṃ sarīraṃ
Ko jīvite ca vibhave ca kareyya rāgaṃ?
44. Kiṃ dukkhamatthi na bhavesu ca dāruṇesu
Sattopi tassa vividhassa na bhājano ko,

Jāto yathā maraṇarogajarābhībhūto
Ko sajjano bhavaratiṃ pihayeyya' bālo?

45. Ke vāpi pajjalitalohagulaṃ gilanti
Sakkā kathañcidapi pāṇitalena bhīmaṃ,
Dukkhodayaṃ asucinissavanaṃ anantaṃ
Ko kāmayetha khalu dehamimaṃ abālo?
46. Loke na maccusamamatthi bhayaṃ narānaṃ
Na vyādhidukkkhasamamatthi ca kiṃci dukkhaṃ,
Evaṃ virūpakaraṇaṃ na jarāsamānaṃ
Mohena bho ratimupeti tathāpi dehe;
47. Nissārato nalakalīkadalīsamaṇaṃ
Attānameva parihaññati attahetu,
Sampositopi kusahāya ivākataññū
Kāyo na yassa anugacchati kālakerā;
48. Taṃ pheṇapiṇḍasadiṣaṃ visasūlakappaṃ
Toyā' nilā' nalamahīuragādhivāsaṃ,
Jiṇṇālayaṃva paridubbalamattabhāvaṃ
Disvā naro kathamupeti ratiṃ sapañño?
49. Āyukkhayaṃ samupayāti khaṇe khaṇepi
Anveti maccu hananāya jarāsipāṇī,
Kālaṃ tathā na parivattati taṃ aṭītaṃ
Dukkhaṃ idaṃ nanu bhavesu acintanīyaṃ?
50. Appāyukassa maraṇaṃ sulabhaṃ bhavesu
Dīghāyukassa ca jarā vyasaṇaṃ ca' nekaṃ,
Evaṃ bhava ubhayatopi ca dukkhameva
Dhammaṃ samācaratha dukkhavināsanāya;
51. Dukkhaḡginā sumahatā paripīlītesu
Lokattayassa vasato bhavavārakesu,
Sabbattatā sucaritassa pamādakālo
Bho bho na hoti paramaṃ kusalaṃ ciṇātha;
52. Appaṃ sukhaṃ jalalavaṃ viya bho tiṇagge
Dukkhanu sāgarajalaṃ viya sabbaloke,
Saṃkappanā tadapi hoti sabhāvato hi
Sabbhaṃ tilokamapi kevaladukkhameva;
53. Kāyo na yassa anugacchati kāyahetu
Bālo anekavidhamācaratīha dukkhaṃ,
Kāyo sadā kali malākālilañhi loke
Kāye rato'navarataṃ vyasaṇaṃ pareti
54. Mīlḡhākaraṃ kalimalākaramāmagandhaṃ
Sūlāsīsallavisapannagarogabhūtaṃ,
Dehaṃ vipassatha jarāmarāṇādhivāsaṃ
Tucchaṃ sadā vigatasāramimaṃ vinindyaṃ;
55. Dukkhaṃ aniccamasubhaṃ vata attabhāvaṃ
Mā saṃkilesaya na vijjati jātu nicco,

Ambho na vijjati hi appamapīha sāraṃ
Sāraṃ samācaratha dhammamalaṃ pamādaṃ;

56. Māyāmarīcikadalīnalapheṇapuñja-
Gaṃgātarāṅgajalabubbulasannibhesu,
Khandhesu pañcasu chaḷāyatanesu tesu
Attā na vijjati hi ko na vadeyya' bālo?
57. Vañjhāsuto sasavisāṇamaye rathe tu,
Dhāveyya ce cirataraṃ sadhuraṃ gahetvā,
Dīpaccimālamiva taṃ khaṇabhaṅgabhūtaṃ
Attāti dubbalatarantu vadeyya dehaṃ;
58. Bālo yathā salilabubbulabhājanena
Ākaṇṭhato vata pibeyya marīcitoyaṃ,
Attāni sārarahitaṃ kadalīsamānaṃ
Mohā bhaṇeyya khalu dehamimaṃ anattaṃ;
59. Yo' dumbarassa kusumena marīcitoyaṃ
Vāsaṃ yadicchati sa khedamupeti bālo,
Attānameva parihaññati attahetu
Attā na vijjati kadācidapīha dehe;
60. Poso yathā hi kadalī suvinibbhujanto
Sāraṃ tadappampi nopalabheyya kāmaṃ,
Khandhesu pañcasu chaḷāyatanesu tesu
Suññesu kiñcidapi nopalabheyya sāraṃ;
61. Suttaṃ vinā na paṭabhāvamihatthi kiṃci
Dehaṃ vinā na khalu koci mihatthi satto,
Deho sabhāvarahito khaṇabhaṃgayutto,
Ko attahetu aparo bhuvī vijjatīha?
62. Disvā marīcisalilāñhi sudūrato bho
Bālo migo samupadhāvati toyasaññī,
Evaṃ sabhāvarahite viparītasiddhe
Dehe paretī parikappanayā hi rāgaṃ;
63. Dehe sabhāvarahite parikappasiddhe
Attā na vijjati hi vijjumivantalikkhe,
Bhāvetha bhāvanaratā vigatappamādā
Sabbāsavappahanāya anattasaññaṃ;
64. Lālākarīsarudhirassuvasānulittaṃ
Dehaṃ imaṃ kalimalākālilaṃ asāraṃ,
Sattā sadā pariharanti jigucchanīyaṃ
Nānāsucīhi paripuṇṇaghaṭaṃ yatheva;
65. Naḥātvā jalañhi sakalaṃ catusāgarassa
Meruppamāṇamapi gandhamanuttarañca,
Pappoti neva manujo hi suciṃ kadāci
Kiṃ bho vipassatha guṇaṃ kimu attabhāve?
66. Deho sa eva vividhāsucisannidhāno
Deho sa eva vadhabandhanarogabhūto,

Deho sa eva navadhā paribhinnagaṇḍo
Dehaṃ vinā bhayakaraṃ na susānamatthi;

67. Antogataṃ yadiva muttakarīsabhāgo
Dehā bahiṃ aticareyya vinikkhamitvā,
Mātā pitā vikaruṇā ca vinaṭṭhapemā
Kāmaṃ bhavyeyu kimu bandhusutā ca dārā?
68. Dehaṃ yathā navamukhaṃ kimisaṅghagehaṃ
Maṃsaṭṭhisedarudhirākālilaṃ vigandhaṃ,
Posenti ye vividhapāpamihācaritvā
Te mohitā maraṇadhammamaḥo vatevaṃ!
69. Gaṇḍūpame vividharoga nivāsabhūte
Kāye sadā rudhiramuttakarīsapuṇṇe,
Yo ettha nandati naro sasigālabhakkhe
Kāmañhi socati parattha sa bālabuddhi;
70. Bho pheṇapiṇḍasadiso viya sārāhīno
Mīlhalāyo viya sadā paṭikūlagandho,
Āsīvisālayanibho sabhayo sadukkho
Deho sadā savati loṇaghaṭova bhinno;
71. Jātaṃ yathā na kamalaṃ bhuvi nindanīyaṃ
Paṅkesu bho asucitoya samākulesu,
Jātaṃ tathā parahitampi ca dehabhūtaṃ
Taṃ nindanīyamiha jātu na hoti loke;
72. Dvattiṃsabhāgaparipūrataro viseso
Kāyo yathā hi naranāri gaṇassa loke,
Kāyesu kiṃ phalamihatthi ca paṇḍitānaṃ
Kāmaṃ tadeva nanu hoti paropakāraṃ;
73. Posona paṇḍitarena tathāpi deho
Sabbattanā cirataraṃ paripālanīyo,
Dhammaṃ careyya suciraṃ khalu jīvamāno
Dhamme have maṇivaro iva kāmado bho
74. Khīre yathā superibhāvitamosadhamhi
Snehena osadhabalaṃ paribhāsateva,
Dhammo tathā iha samācarito hi loke
Chāyāva yāti paraloka mito vajantaṃ;
75. Kāyassa bho viracitassa yathānukūlaṃ
Chāyā vibhāti rucirāmaladappaṇe tu,
Katvā tatheva paramaṃ kusalaṃ parattha
Sambhūsitā iva bhavanti phalena tena;
76. Dehe tathā vividhadukkha nivāsabhūte
Mohā pamādasagā sukhasaññamūlā,
Tikkhe yathā khuramukhe madhulehamāno
Bāḷhañca dukkhamanugacchati hīnapañño;
77. Saṃkapparāgavigate niratattabhāve
Dukkhaṃ sadā samadhigacchati appapañño,

Mūḷhasa ceva sukhasaññamihatthiloke
Kiṃpakkameva nanu hoti vicāramāne;

78. Sabbopabhoga dhanadhaññavisesalābhī
Rūpena bho sa makaraddhajasannibhopi,
Yo yobbanepi maraṇaṃ labhate akāmaṃ
Kāmaṃ paratthaparapāṇaharo naro hi;
79. So yācako bhavati bhinnakapālahattho
Muṇḍo dhigakkharasatehi ca tajjayanto,
Bhikkhaṃ sadāribhavane sakucelavāso
Dehe paratthi paracittaharo naro yo;
80. Itthī namuñcati sadā puna itthibhāvā
Nārī sadā bhavati so puriso parattha,
Yo ācareyya paradāramalaṅghanīyaṃ
Ghorañca vindati sadā vyasanañca nekaṃ;
81. Dīno vigandhavadano ca jaḷo apañño
Mūgo sadā bhavati appiyadassano ca,
Pappoti dukkhamatulañca manussabhūto
Vācaṃ musā bhaṇati yo hi apaññasatto;
82. Ummattakā vigatalajjaguṇā bhavanti
Dīnā sadā vyasanasokaparāyaṇā ca,
Jātā bhavesu vividhesu virūpadehā
Pītvā halāhalavisaṃva suraṃ vipaññā;
83. Pāpāni yena iha ācaritāni yāni
Yo vassakoṭinahutāni anappakāni,
Laddhāna ghoramatulaṃ narakesu dukkhaṃ
Pappoti cettha vividhavyasanañca nekaṃ;
84. Lokattayesu sakalesu samaṃ na kiṃci
Lokassa santikaraṇaṃ ratanattayena,
Taṃtejasā sumahatā jitasabbapāpo
Sohaṃ sadādhigatasabbasukho bhavyeṃ;
85. Lokattayesu sakalesu ca sabbasattā
Mittā ca majjharipubandhujanā ca sabbe,
Te sabbadā vigatarogabhayā visokā
Sabbhaṃ sukhaṃ adhigatā muditā bhavantu;
86. Kāyo karīsabharito viya bhinnakumbho
Kāyo sadā kalimalavyasanādhivāso,
Kāye vihaññati ca sabbasukhanti loko
Kāyo sadā maraṇarogajarādhivāso;
87. So yobbanoti thaviroti ca bālakoti
Satte na pekkhati vihaññatireva maccu,
Sohaṃ ṭhitopi sayitopi ca pakkamanto
Gacchāmi maccuvadanaṃ niyataṃ tathā hi;
88. Evaṃ yathā vihitadosamidaṃ sarīraṃ
Niccaṃva taggatamanā hadaye karoṭha,

- Mettaṃ parittamasubhaṃ maraṇassatiṅca
Bhāvettha bhāvanaratā satataṃ yatattā;
89. Dānādi puññakiriyāni sukhudrayāni
Kativā ca tamphalamasesa mihappameyyaṃ,
Deyyaṃ sadā parahitāya sukhāya ceva
Kimbho tadeva nanu hatthagatañhi sāraṃ?
90. Hetuṃ vinā na bhavatī hi ca kiṃci loke
Saddova paṇitalaghaṭṭanahetujāto,
Evañca hetuphala bhāvavibhāgabhinno
Loko udeti ca vinassati tiṭṭhatī ca;
91. Kammaṃsā kāraṇāmayāñhi yathā avijjā
Bho kammanā samadhigacchati jātibhedaṃ,
Jātiṃ paṭicca ca jarāmarañādidukkhaṃ
Sattā sadā paṭilabhanti anādikāle;
92. Kammaṃ yathā na bhavatīha ca mohanāsā
Kammakkhayāpi ca na hoti bhavesu jāti,
Jātikkhayā iha jarāmarañādidukkhaṃ
Sabbakkhayo bhavati dīpevānilena;
93. Yo passatīha satataṃ munidhammakāyaṃ
Buddhaṃ sa passati naro iti so avoca,
Buddhañca dhammamamalañca tilokanāthaṃ
Sampassitūṃ vicinathā'pi ca dhammataṃ bho;
94. Sallaṃva bho sunisitaṃ hadaye nimuggaṃ
Dosattayaṃ vividhapāpamalena littāṃ,
Nānāvidhabyasanabhājanamappasannaṃ
Paññāmayena balisena nirākarotha;
95. Nākampayanti sakalāpi ca lokadhammā
Cittaṃ sadāpagatapāpakilesasallaṃ,
Rūpādayo ca vividhā visayā samaggā
Phuṭṭhaṃva merusikharaṃ mahatānilena;
96. Saṃsāradukkhamagaṇeyya yathā munindo
Gambhirapāramita sāgaramuttarivā,
Ñeyyaṃ abodhi nipuṇaṃ hatamohajālo
Tasmā sadā parahitaṃ paramaṃ ciṇṭhā;
97. Ohāya so' dhigatamokkhasukhaṃ paresaṃ
Atthāya saṃcari bhavesu mahabbhavesu,
Evaṃ sadā parahitaṃ purato karitvā
Dhammo mayānucarito jagadatthameva;
98. Laddhāna dullabhataṅgaṃ manussayoniṃ
Sabbāṃ papañcarahitaṃ khaṇasampadañca,
Ñatvāna āsavanudekahitañca dhammaṃ
Ko paññavā anavaraṃ na bhajeyya dhammaṃ?
99. Laddhāna buddhasamayaṃ atidullabhaṃca
Saddhamma maggamasamaṃ sivadaṃ tattheva,

Kalyāṇamittapavare matisampadañca
Ko buddhimā anavaraṃ na bhajeyya dhammaṃ?

- 100.** Evampi dullabhataraṃ vibhave suladdhā
Maccheradosa viratā ubhayatthakāmā,
Saddhādidhammasahitā satatappamattā
Bho! Bho! Karoṭha amatādhigamāya puññaṃ;